



Publicaziuns dalla vischnaunca, jamna 51

Lubientschas da baghegiar

L'istanza da baghegiar ha concediu suandontas lubientschas da baghegiar:

Nr. 2012-1055.001

Gery e Susanne Hafner, Obere Giesslistr. 7, 7130 Ilanz; baghetgs d'economia 442 e 438: midada d'intent per diever da habitar, midada da project dils 27 da fenadur 2012, parcella 448, Via Bugnei 3 e 5, 7186 Segnas.

Nr. 2012-1065

BVH Partner AG, Casa Ventira, 7402 Bonaduz; Vitget Crestas al Crest d'Acletta, construcziun d'ina surbaghegiada cun casas d'ina habitaziun e casas da pliras habitaziuns, parcella 1329, Crest d'Acletta, 7180 Disentis/Mustér.

Nr. 2012-1067

Michele Affolter, Via del Sole 11A, 6963 Pregassona; construcziun d'ina casa da pliras famiglias, parcella 2222, Via Caschuarz, 7180 Disentis/Mustér.

Nr. 2012-1068

Evelina e Silvio Giger-Manetsch, Via da Scola 6, 7180 Disentis/Mustér; construcziun d'in niev balcon, parcella 700, Via da Scola 6, 7180 Disentis/Mustér.

Nr. 2012-1071

Hans ed Elvira Möckli-Fry, Via Davos-Mustér 4, 7180 Disentis/Mustér; Spazzar il baghetg d'economia e construir ina casa da pliras famiglias, parcella 571, Via Latis, 7180 Disentis/Mustér.

Nr. 2012-1072

Coray Capaul Immobilien GmbH, Via Lucmagn 4, 7180 Disentis/Mustér; engrondaziun e sanaziun dalla casa sin parcella 40, Via Curtins 11, 7186 Segnas.

Quellas lubientschas san vegnir contestadas enteifer 30 dis dapi la publicaziun el Fegl ufficial dalla Surselva tier la Dertgira administrativa dil cantun Grischun.

Disentis/Mustér, ils 18-12-2012
Uffeci da baghegiar Disentis/Mustér

Bien di, bien onn

Era egl onn che va prest da rendiu havein nus instradau e realisau entginas ovras da gronda muntada per la vischnaunca. Quei progress ei mo pusseivels grazia alla buna concordanza ed al grond sustegn dalla populaziun.

Cun la fin da december 2012 remettel jeu l'incarica surprida avon tschun onns. Jeu senezegel da quella caschun per admetter in profund Dieus paghi a vischins e vischinas sco era a tuttas collaboraturas e collaboraturs per il sustegn e per tutta lavur en favur dil beinstar communal. Jeu engraziel per la buna concordanza e per l'emperneivla collaboraziun duront quei temps da grondas midadas e refuormas. Communablamein havein nus prestau biara e buna lavur e saviu realisar numerus projects da valor cuzzonta.

Giavischond a vischinas e vischins bialas e benedidas fiastas da Nadal, sperel jeu ch'ei reusseschi da garantir vinavon progress e prosperitad en favur dil beinstar da nossa populaziun. Cun cordials salids ed auguris per in legreivel e benediu 2013.

*En num dalla suprastonza communal
Dumeni Columberg, president communal*



Administraziun communal

Sur las fiastas da **Nadal** e **Daniev** ei l'administraziun communal **serrada** ils suandonts dis:

gliendisdis, ils 24 da december 2012
mardis, ils 25 da december 2012
mesjamna, ils 26 da december 2012, Sogn Stiafen
gliendisdis, ils 31 da december 2012
mardis, igl 1. da schaner 2013
mesjamna, ils 2 da schaner 2013

Nus giavischein ina biala fiasta da Nadal ed in bien onn 2013!
Administraziun communal Disentis/Mustér

Cussegl da vischnaunca Seduta constitutiva

Venderdis, ils 11 da schaner 2013 allas 19.00 ha liug en halla Cons la seduta constitutiva dalla nova perioda d'uffeci.
Cun quella occasiun vegnan las autoritads communalas saramentadas. Quella manifestaziun ei publica e destinada per l'entira populaziun. *Suprastonza communal*

Il cussegl da vischnaunca s'occupescha cun l'energia L'Ovra Russein vegn realisada

En sia seduta finala diils 14 da december 2012 ei il cussegl da vischnaunca s'occupaus cun projects d'energia. Dapi onns sestenta la vischnaunca da nezegiar meglier las atgnas resursas. Cun satisfaziun ha il parlament communal priu enconuschientscha che la societad Ovra Russein SA ei vegnida fundada ils 29 da november 2012. La vischnaunca ei participada cun 15% ni treis milliuns francs al capital d'acziun. Ella ha cheutras il dretg ad energia da participaziun. Plinavon ha ella obteniu ina indemnizaziun da 5,335 milliuns francs. Cun quels daners sa la situaziun finanziaria dalla vischnaunca vegnir migliurada marcantamein. In importo da varga dus milliuns va en ina reserva per investiziuns sil sector dallas energias regenerablas. Igl ei previu d'entscheiver igl avrel 2013 cun la realisaziun dil project. Las lavurs cuozan biebein dus onns.

Igl ual d'Acletta vegn examinaus

Dapi 2009 s'occupescha la suprastonza communal cun l'explotaziun dall'aua diils uals d'Acletta e Clavianev. Las retschercas han mussau ch'ina incorporaziun da quella Ovra Russein sepaga buc. Ina explotaziun ei mo pusseivla cun agid da contribuziuns dalla Confedera - zion (KEV). Quella constataziun vala per tuttas variantas examinadas. Perquei ha la suprastonza communal gia annunziou il project a Swissgrid. Cunquei ch'ei settracta d'in ual exponiu, pretenda ei gronda precauziun ed ina buna concordanza cun las organisaziuns digl ambient.

Tenor il preproject ein pliras sligiazions pusseivlas, denter auter in model da cooperaziun cun ina interpresa dalla branscha ni ina realisaziun entras la vischnaunca senza cun fundar ina societad acziunara. Cun in capital da rodond 2,5 milliuns francs duess ei esser pusseivel da financiar ina investiziun da 12,5 milliuns francs. L'otra opziun ei ina realisaziun en cooperaziun cun in partenari specialisau cun la pusseivladad d'obtenir energia da participaziun. Tier las variantas recamonda il cussegliader dalla vischnaunca da seconcentrar sin igl ual d'Acletta (cun ina centrala sur la staziun dallas pendicularas). Quella porti ils pli gronds avantatgs.

Il cussegl da vischnaunca ha discussiunau vivamein las differentas pusseivladads. El beneventa ina explotaziun digl ual d'Acletta ed ha decidiu da continuar cun las preparativas. La suprastonza communal duei preparar ina sligiazion adattada per ina gudida optimala dall'aua dalla Val Acletta. Leutier seigien plirs models d'examinar, primarmein ina realisaziun «en atgna reschia» ni en cooperaziun cun ina interpresa sil sector dall'energia sco era autras cumbinaziuns. El medem mument ha el concediu per quella lavurs in credit da 100 000.– francs che vegn adossaus alla reserva speciala, creada per las energias renovablas.



In temps da grond success

Cun quella seduta ei la perioda d'uffeci dils organs communal 2009/2012 ida a fin. Sco la presidenta *Rita Huonder-Tenner* constatescha, bandunan buca meins che 11 commembras e commembers il parlament communal. Heinrich Berther ha per exempel apparteniu 28 onns a quei organ. Igl ei stau ina perioda da gronda e buna lavur.

Sco il president communal *Dumeni Columberg* constatescha eis ei stau pusseivel da realisar en quei temps varga 60 projects. 23 ein vegni suttamess alla votaziun dil pievel. Tuts ein vegni approbai! 30 fatschentas ein stadas suttamessas al referendum. Il president partent ha tgamunau la vischnaunca en tut durent 22 onns.

Las fatschentas principalas dils davos tschun onns ein stadas la refuorma fundamentala dalla structura ed organizaziun communal, la nova constituziun, la revision totala dalla planisaziun locala, il niev luvratori per il survetsch tecnic, la renovaziun dalla casa communal, la sanaziun dil Center da sport e cultura, la colligiaziun dils edifecis communal alla nova centrala d'energia, la fusiun dils pumpiers da Sursassiala, l'avertura dalla zona d'industria Pignola sco era l'Ovra Russein, l'entschatta dalla meglioeraziun funsila e l'engrondaziun dalla Casa da tgira Sursassiala. Las finanzas communalas han saviu vegnir consolidadas ed ils deivets reduci per bunamein 10 milliuns francs. Sil sector turistic seppresentan novas perspectivas e schanzas per ina collaboraziun denter Mustér, Sedrun ed Andermatt. Quei ei ina buna basa da partenza per igl avegnir.

Suprastonza communal

Reducziun individuala dallas premias dalla cassa da malsauns 2012

Persunas e famiglias che vivan en relaziuns economicas mudestas san, risguardond certas premias, dumandar contribuziuns vid las premias dall'assicuranza da basa obligatoria per la tgira da malsauns (LAM).

Persunas che han aunc buca fatg diever dil dretg san far quei entochen **la fin digl onn 2012 (davos termin, datum dil bul da posta 31-12-2012).**

Informaziuns, basa legala, muossavia ed il formular d'annunzia anfleis Vus sin la pagina d'internet www.sva.gr.ch. Vus saveis era retrer ils formulars tier l'administraziun communal.

Per damondas stein nus bugen a Vossa disposiziun
Administraziun communal

Plazza da rimnada a Raveras

Sur las fiastas da **Nadal** e **Daniev** ei la plazza da rimnada a Raveras **aviarta** ils suandonts dis:

sonda, ils 22 da december 2012 dallas 10.00–12.00

sonda, ils 29 da december 2012 dallas 10.00–12.00

sonda, ils 5 da schaner 2013 dallas 10.00–12.00

Tut ils auters dis resta la plazza da rimnada a Raveras serrada.

Nus giavischein ina biala fiasta da Nadal ed in bien onn 2013!



**Societad da musica Mustér
Concert da Nadal**

Sonda, ils 22 da december 2012 allas 20.15 en baselgia S. Gions, Mustér. Silsunter stiva da caffè en halla Cons.

Cordialmein envida *Societad da musica Mustér*
Mira era inserat dils 21-12-2012.

10. exposiziun d'art en casa da scola Segnas ils 26/29/30-12-2012

Temps d'avertura:

Mesjamna, ils 26-12-2012 dallas 14.00 –22.00
Sonda, ils 29-12-2012 dallas 14.00 –22.00
Dumengia, ils 30-12-2012 dallas 14.00 –19.00

Ovras da: Barbara Donnarumma, Renata Lutz, Claudia Wolf, Mauro Loretz, Wendelin Jacomet, Jörg Arnoldi, plinavon stat igl artist Linus Flepp a disposiziun en siu atelier. Ustria: stiva da caffè cun spezialitads dil vitg. Entrada: libra

Organisatur: Chor baselgia Segnas

Sentupadas d'advent el vitg da Segnas

Selegrar, tedlar historias, gustar, rir, sediscuorer, smarvegliar ... tut quei ed aunc dapli vulein nus, pigns e gronds, far communablamein duront las sentupadas d'advent el vitg da Segnas.

Nossa proxima sentupada cun devoziun d'advent ensemen culs affons dalla gruppa dil Salid dil Segner e dil rudi d'affons Artgin ha liug:

Dumengia, ils 16 da december 2012 allas 17.00 en baselgia s. Roc e s. Bistgaun a Segnas.

Cordial beinvegni als affons cun lur famiglias ed all'entira pleiv.
Gruppa d'organisaziun dil vischinadi Segnas
Salid dil Segner e rudi d'affons Artgin

Decoraziuns d'advent el vitg da Segnas

Visitei nies vischinadi e seschei inspirar dall'atmosfera dil bi temps d'advent. Ils loghens decorai tenor ina historia ein illuminai mintga sera dallas 17.00–22.00 entochen ils 6 da schaner 2013.

Decoraziun tier la historia dalla plonta steilida: gruppa Cuoz, sper caplutta.

Decoraziun tier la historia dalla nuorsa nera, che vuleva esser alva: gruppa amiez vitg, clavau da Claudia e Clemens Berther-Bearth (sur l'anteriura posta).

Nus selegrein da Vossa viseta!
Gruppa d'organisaziun dil vischinadi Segnas

Contact: Regina Giger-Caminada,
079 228 53 23, mail: contact@rgc-art.ch